



江蘇文獻集成

范道濟點校

查慎行全集

第九冊

中華書局



范道濟
點校

查慎行全集

第九册

中華書局

敬業堂詩集卷三十七

槐篠集上

起己丑正月，盡十二月。

去宣武門西半里許，有陋室十餘間，扃鎖頽廢有年矣。己丑二月自西苑下直歸，從馬上望見老槐二樹，亭亭出屋，顧而樂之，遂僦居焉。《爾雅》「連謂之篠」疏：「樓閣邊相連小屋名也。」因借樹以名吾集。

春冰次院長韻

怪底堅成脆，行逢凍釋時。寒無蟲可語，暖被鴨先知。裂縫防頽岸，留痕驗故池。何當供夕飲，春氣漸如炊。

人日出郊

老夫新年年六十，酬應昏昏忘盥櫛。朝來準擬出郊行，走馬看山作人日。西風撲面飛黃埃，忽憶故園新種梅。詩成寄問草堂弟，臘尾春頭開未開？
去年正月，於西阡種梅數十本。

院長餉新年食物兼示四絕句次答

《類篇》止有鮓魚字，梵語蘇詩恐誤人。《說文》、《玉篇》俱無鮓字，司馬公《類篇》有鮓魚。《釋氏稽古略》謂「竇公吐鮓成活魚」，今江中洄魚是也。東坡詩中作鮓。洄與鮓當是鮓字之訛。《本草》失於考證，故及之。我是江

湖釣竿手，爲公箋釋到纖鱗。
次韻鮓魚。

半殼含胎剖蠣房，鮮宜糟壓嫩宜湯。黃封拜賜連朝醉，特試先生醒酒方。
蠣黃淪湯，可以解醒。

次韻蠣黃。

吾鄉海錯雜魚蝦，細瑣登盤品亦嘉。忽見銀鉤如椀大，閩人好對浙人誇。
次韻對蝦。

《嘉禾》舊志說陶莊，黃雀肥時早稻香。徐碩《至元嘉禾志》：「黃雀出陶莊，秋後最肥。」自別家來無嗜

好，滿餅鄉味荷分嘗。
次韻黃雀。

春風次院長韻

又隨步履散今朝，紫陌微微去轉遙。頗訝渡河冰易泮，不知吹鬢雪難消。南枝暗放參差蕊，東面偷迎宛轉條。二十四番誰管領，等閒聽過賣錫簫。

次韻春雪

春寒不與臘寒同，微霰來沾弄袖風。翠浪舞當三白後，香泥巧借六花融。飄殘柳外濛濛絮，送盡江南片片鴻。莫倚侵陵萱草色，繞階須護蕙蘭叢。

長孫興祖就婚雲夢寄詩示之十韻

聞說求婚媾，爲期在此春。抱孫吾計日，配婦汝成人。雪棹吳江岸，風帆楚水濱。間關憐道遠，出贅笑家貧。締好因同譜，親家沈翰逸，爲癸酉鄉同年。居鄉本比鄰。禮從荆布舊，義取帨褵新。莫倚嬌爲壻，須存敬似賓。葭莩方有託，骨肉自相親。去迨冰開候，歸當燕乳辰。阿翁南望切，書報勿辭頻。

院長餉柿霜餅兼示長律十二韻次謝

駢實交柯重，金烏下啄同。小園秋晚挂，古寺日高烘。爛爛燒空赤，蒸蒸耀眼紅。帶留紅袖織，用白香山詩中事。葉受墨光融。用鄭虔事。耿餅佳名著，梁棹上品充。滑疑流石蜜，寒欲殺尸蟲。玉井千珠落，丹田一氣通。齒疏宜軟美，喉潤覺清空。止嗽方殊驗，時余方苦痰嗽。迴腸味不窮。殷勤開尺幅，檢點閉輕籠。食罷仍蠲渴，詩來況愈風。多煩霜雪意，寵貺白頭翁。來詩結句云：「還堪持獻壽，好配紫芝翁。」

院長以乳酥餅見餉仍有詩索和謂余深於禪理戲作偈語

次韻奉酬

昔聞佛者言，醍醐蓋有自。初從牛乳出，香美非思議。於中得酥酪，先後當以次。我意殊不然，強生分別事。先生味禪悅，故以機相試。聚爲一團酥，是一要非二。散爲百千餅，又豈百千味。當其爲乳時，涓滴白牛致。云何清淨腸，猥用忍草飼。我無廣長舌，報以真實義。請看牧牛者，苦苦掣其鼻。不若聽所之，放牛着露地。人牛兩自在，彼味非此嗜。莫管乳酪酥，醍醐孰同異。

以紫檀鏤管筆一雙饋院長兼呈拙句

客從吳興來，遺我雙不律。森然秋兔穎，毫末羞自匿。削管用紫檀，可手製新出。兔冠頭不禿，肯人中書室。我老腕力微，何心計贏紬。學書疑有鬼，覓句懶無匹。留之注蟲蝦，如膠柱鼓瑟。故用移贈公，庶幾副其實。吳俞世不作，吳政、俞俊，皆北宋時筆工也。諸葛法久失。錢沈亦名流，後來費評騭。雖非金與銀，鏤刻分纂述。猶勝斑與赤，輕脆抱空質。上將點絲綸，次亦標甲乙。含毫特餘興，揮灑膏繼日。新年富新詠，傳示盈卷帙。浩汗或掣鯨，精微乃貫蝨。儲材等武庫，應敵在倉卒。不以老見輕，有作例牽率。余雖勉屬和，十駕爭及一。從公乞餘波，仍以詩侑筆。

湯西厓前輩自洛中寄示重修香山寺記石刻拓本

龍門十寺已全荒，金刹誰尋古道場。劫外豐碑開闕塞，天中軼事在文章。雲泉舊境緣曾結，白樂天《香山寺》詩：「且共雲泉結緣境，他生應作此山僧。」山水初心後果償。「幸爲山水主，是償初心復，始願之候也。」語出樂天《重修寺記》中。公是樂天還記否？前題多在暢師房。

斗室

斗室無風入，香嚴正寂然。一株婆律火，半榻祖師禪。白雪將灰候，青烟未吐前。此時參鼻觀，消息向誰傳？

題吳寶崖雪龕煨芋圖小照

神仙只累十年官，枵腹聊爲一飽歡。何似雪龕風味好，平生不喫懶殘殘。「山人更喫懶殘殘」，東坡逸詩句也。

去年過塔灣湘雨禪師出所纂金剛經順意見示攜之行笈
欲爲刊刻流傳有志而未逮近以呈院長蒙疊筆字韻詩
盛相稱詡輒次韻奉酬敢請院長爲功德主此篇聊當募
緣偈一首也呵呵

五十墮醉夢，不知經論律。一從讀《金剛》，稍開雲霧匿。深沈百尺低，垂綆汲使出。游子

久離鄉，于焉返家室。既歸翻自痛，精進力已絀。欲除人我相，兩敵勁無匹。又爲義疏誤，孰與更張瑟。晚遇馬蹟師，貝多示真實。微詮警後悟，妙解證前失。俗昧知者希，我衰天所驚。誓將廣流布，期不虛纂述。先生一見之，析義豈待質。執疑兩破碎，決若魚去乙。詩來盛稱揚，方便皎慧日。黑蟻二萬言，卷之僅盈帙。護持付龍象，普度及蟻蝨。開雕指顧成，功德亦易卒。檀那視積累，幸以銖兩率。恒河計沙數，百億生于一。庶將擬《楞嚴》，勝授房融筆。

座主太宗伯許公七十壽辰敬呈長律四章

巖廊重望冠清都，黃髮年尊與道俱。燕許文章唐巨手，程朱理學宋醇儒。龍門拔地孤逾峻，鳩杖隨身健不扶。指似天文人盡識，壽昌方叶泰階符。司徒崇秩晉春卿，端右迴翔寄不輕。公自起家敦孝友，世因瞻斗重科名。衣冠盛事耆英社，鄉國餘風月旦評。歷政不緣中外異，依然冰貯玉壺清。

集賢曾寫樂天真，九老中今第幾人。三月韶光連上巳，三月二日公誕辰也。七旬觴詠屬初辰。芝蘭得氣殊庭秀，桃李成陰薄海春。共仰官高能下士，虛懷仍以讀書親。

朝回晝靜愛長閒，笑說生平杯酒間。却向煙霄頻矯首，每從風月一披顏。莼鱸遠夢馳千

里，松鶴高情在兩山。欲御籃輿知有處，谷湖柳色待公還。

余自甲申春寓城南道院丙戌十一月請假暫歸戊子三月
抵都重館於此己丑上巳前一日將移居宣武門外臨行

題壁

三間古觀稱羈棲，五見空梁補燕泥。欲去每教僮灑掃，再來猶認客留題。壁間有同年王方若題句。飛鴻印雪原無跡，倦馬辭槽又一嘶。怪底老懷殊戀戀，西山多在短牆西。

西苑新直廬

在澹寧居後。

雪林風沼候參差，休假俄經百日期。去年十一月奉旨暫停入直，至今年二月恰百日矣。魚鑰曉嚴新契勘，鄭谷詩「門嚴新契勘」。鳳巢春換舊棲枝。路迴稍覺穿花遠，窗靜從看過影遲。笑逐班行重入直，龍鍾已是杖鄉時。

移寓示潤木二十韻

久客身何着，今來願始諧。買鄰無百笏，僦舍爲雙槐。中庭有老槐二株。迢遞連城角，沿洄阻

水涯。閒坊聲較靜，濕地勢微注。東野攜家具，西枝寄病骸。未能行躡屐，那免出傳牌。橐俸先期給，銅童冒雨差。無妻中饋缺，與弟入門偕。白木牀分設，烏皮几對揩。布衾寬稱席，石炭賤踰柴。茶竈商量置，書籤整娖排。窗緣絲網掃，池用瓦盆埋。卷幔通巢燕，登拌待食鮭。厨空浮白琺，壁挂踏青鞵。車騎經過闕，風光漸次佳。但教塵隔巷，翻愛草侵階。擊鉢旋相和，吹簫分不乖。近宜論洽比，遠或召朋儕。汲井昊天寺，買花南市街。經旬許休澣，亦未廢清懷。

三月三日雪後赴西苑馬上作

鳳城西北苑東偏，白髮尋春又一年。殘雪泥融芳草岸，昨夜微雪。薄寒風勒柳花天。非無好景來林外，尚少游人到水邊。獨把吟鞭欹醉帽，時逢修楔想歸田。

暢春園杏花次李義山舊韻

杏苑即仙源，含情似欲言。問名憐及第，鄭谷《曲江紅杏》詩：「爲是春風及第花。」得氣儼承恩。流水悠悠溶態，初陽淺澹痕。綠新宜柳映，紅遠覺桃繁。蝶翅輕三月，鶯聲戀一園。盈盈窺紫闥，脉脉待黃昏。小睡披香暖，微酣滯雨溫。臘融難作蒂，溫飛卿詩：「融蠟作杏蒂。」脂染定連

根。何處堪凝望，逢人自悅魂。青旗風綽影，猶記酒邊村。

落花和陳潛齋學士韻

桃是深粧杏淺粧，開時有態落猶香。東風自借孤蓬力，流水何曾出苑牆。

同年蔣酉君卜築西郊詩以落之仍次移居二十韻

薄宦居難定，同時興偶諧。我方銘《陋室》，君亦賦《高齋》。趙閱道有《高齋》詩。作計寧非達，
爲生洵有涯。背城山漸近，就水地宜洼。昨搆才容膝，今營儼樹骸。舊材留梓澤，新棟拆
松脾。斤斧俄收響，僮奴免借差。落成三月速，扶挈一門偕。棗軸疲牛汗，楊椿疥馬揩。
煙光通禁籙，野氣入荆柴。但取藩籬便，何須闔戟排。書奇傾橐買，樹好帶花埋。北釀缸
浮螳，南烹案致鮓。僧來攜蜀絹，信去覓吳鞵。壽母藤輿健，嬌兒繡褓佳。碧枝風卷幔，
紅藥雨翻階。即事歡皆具，生平願豈乖。宵歸辭俗客，晨直約吾儕。故國三千里，黃塵十
二街。算來除蔣徑，無此好情懷。

暢春園芍藥

萬卉爭春放，開遲賸此花。雅禁初日照，濃被綠陰遮。隔岸浮香霧，臨池蕩綺霞。年年三月尾，病眼閱繁華。

西君同年餉甘蔗

小束青如削，來從櫻筍鄉。特煩良友餉，何異大官漿。促節過頭杖，清泉漱齒霜。多君甘旨外，有味必分嘗。前一日先惠櫻桃，故云。

下直經澹寧居後見新竹出牆

輕雷夜解斑籠籜，地近宮垣勢便高。應笑松栽成早偃，多年猶未出蓬蒿。

四月二十四日奉旨偕錢亮功汪紫滄兩同年赴武英書局

編纂佩文韻府口占示同事諸君二首

六年供奉毫無補，天語蒙褒下禁中。聯步久趨丹陛北，直廬今寓浴堂東。名連進士慚同

進，管禿中書笑不中。那免退之譏磊落，依然《爾雅》注魚蟲。

上窺典故薄《風》《騷》，不數區區篆刻勞。才盡更誰哀老子，課嚴渾似限兒曹。舊巢未掃痕猶在，奉旨編纂事竣，仍回南書房供奉。賜馬相隨骨漸高。差勝漢廷飢曼倩，官厨豐饌日仍叨。

武英殿後老桑

出牆如蓋勢童童，初日移陰小殿東。辜負江鄉蠶老候，烏鴿餘榭滴階紅。

六十生日竹垞先生遠寄名錫唾盃茶餅

張銅沈錫皆禾產，一技成名不偶然。今日瓶盃成古器，後生誰識百年前？

槐陰露坐

我愛雙槐好，婆娑滿院遮。蟠根容穴螳，出屋帶棲鴉。未落三秋葉，將舒六月花。近身安片席，餘蔭給鄰家。

鵲雛爲鄰貓所攫

庭南老槐樹，當暑花葉敷。有鵲棲其間，雌雄將六雛。毛羽日夜長，飼哺同慈烏。家書故鄉來，好客與之俱。查查每預報，喜氣充我閭。自謂得所主，永無意外虞。鄰家黑白貓，眈視生覬覦。陰藏爪牙毒，上樹捷飛歸。六雛一被攫，鵲起逐以趨。似將奪虎口，性命還須臾。又似望人援，繞簷群噪呼。倉皇不及救，坐視爲嗟歎。我墉被鼠穿，唧唧繁有徒。孔箱盜夜粟，穴紙潛朝餉。汝雖磔百千，飽噉卧毳毼。誰當刻責汝，加以非分誅。鼠黠鵲性良，飛走族亦殊。云胡於此暴，顧獨於彼懦。叶平。於彼爲養奸，於此戕無辜。汝腹縱暫滿，汝腸義當剖。吾欲致張湯，詰之定爰書。公然掉尾去，借鄰以逃逋。

自書局回寓作

書局限孔嚴，晨趨事搜討。歸來日云夕，返景在林杪。槐花滿中庭，鋪積亦復好。小童懶無匹，安坐終日飽。故欲習其勤，時時令汛掃。清風颯然至，葉有先秋槁。頗聞蒙莊言，勞生佚以老。信書乃大繆，自計胡不蚤？

喜雨

京師夏苦旱，熏灼如炎方。霖霖偶微霑，喝者盈道旁。滂沱忽大沛，慄怒不得張。簷溜粗於繩，翻瓢挹天漿。栽花得新活，卧柳回舊僵。既雨萬彙蘇，我亦中微涼。風霆一夢破，境過旋已忘。

大雨過玉螭橋

雨聲衝破影中天，百尺長虹萬頃煙。鷗鷺不爭車馬道，自遮荷蓋領雛眠。

新晴赴書局

積雨暑未退，快晴天爲高。肩輿出衝泥，俯仰同桔槔。豈不恤人力，用代鞍馬勞。竊祿多懷慚，何如返蓬蒿。

庭樹聞蟬

委蛻知何處，吾廬忽有蟬。不嫌晴晝永，轉愛綠陰圓。薄比彈冠況，清同舉室懸。柴門虛